


Exemplum genituræ propositæ.



Conclusio prima. Natum regem futurum magnæ potentia, claricq; nominis, ratione multitudinis substantiæ uetustæ, & exercituum, expeditionum, atq; subditorum, significat luminare temporis in signo masculino, igneo, & in angulo, circumdatum radijs Saturni in angulo forti, & radijs Martis perfecte receptum in signo regio existentis, atq; Mercurio domino Medij cœli & ascendentis, Huic rei testimonio est stirpis suæ origo.

Conclusio secunda. In pecuniæ uetustæ adeptione difficultatem sentiet, propterea quòd Saturni ad Solem applicatio fit de quadrato.

Conclusio tertia. Gaudebit in mortuorum substantijs, & id quod consequetur, non ad seruandum reponet, uerum mox donationibus liberalibus atq; magnificis consumet, trahitur hoc ex Saturno forti in domo sua, & angulo.

Conclusio quarta. Significatorem officij sui Mercurium accipio. Nam nullus exit de sub radijs matutinis, nec aliquis est in Medio cœli.

Conclusio quinta. Ergo officij sui erit, ingenio, atq; consilijs populos regere, exercitus ducere, malos punire, leges, iuracq; statuere, & iustitiam administrare. Sumitur hoc ex domino officij, qui Soli in signo regali applicat, suam ipsi dignitatem tribuens, trino Marti permixtus. Idem patet ex parte operis, & magisterij, in trino Solis & Martis, in signis regalibus. Deniq; Almuten est omnium significatorum regni, ipse Sol. Item stella fixa primæ magnitudinis Humerus Orionis naturæ Martis & Mercurij, est in cuspide Medij cœli.

Conclusio sexta. Per se erit occasio regni sui, & dominij, coniectura est, quod idem est dominus ascendentis, & Medij cœli, Soli in applicatione sua applicans.

Conclusio septima. Dignitatem in altis dominijs & potentiam in populis, & quòd maiorum suorum uestigijs inhærebit, ostendit Saturnus primus dominus triplicitatis huius domus, fortis & potens in domo propria.

T Conclusio